



LST bulphuh : "Amaute Pasion, Topa ahi minam thupha ngah ahi hi" Phatna-late 33:12

A Kizomsuak Khantohna Le Khuapi Zuana Teenna (Sustainable Development Vs Urbanization)

Mun khat, gam khat khantoh nading a kitangsam thu le la tampi lak pan a thupipen a hi vaipuak (Tavuan) a neipente pen tua mun le tua gamah a teng te' ngaih sutna, pilna, siamna hong saan tektek ciang bekin a nunzia uh (Living Standard) hong sang semsem pan ding hi. Cihnopna ah gam khantoh nading a thupipen in a khatna ah Mite (Human - Resource), gam mite mah ahi hi.

Leitung gam tuamtuan en lehang tuipi tawh a kigamla, a kipaillet lo gamte (Inland) le mualdawn guamkawmte a khantoh nading baih pak thei lo hi. Tua munte ah khua khat le khua khat, mun khat le mun khat kizopna lampite hoih thei lo ahih manin Communication, Transportation issues haksatna tampi tak hong piang zel hi.

Ei Zo mualtung mite teenna mun ahi Zogam pen tuma lam kum sawtpi lai-in singkung, lopa tuamtuan tawh taangua golpipi omna, mun le lei hi ngiat ding hi. Mite tua munah hong teeng uh a, mi tampi hong teen a ki pan, i mun i gamte ah singkung, lopa te a kipan ganhing tampi tak hong bei tektek a, lo khawh singphuk dan (Method) theih loh manin i mun i gamte pen hong kisia a, hong kolh semsem ta hi. Ngaihsut huai thu hi.

" Sustainable development " ih cih pen, i mun i gam pen ei i khansung teng bek a, i zat ding, i kham ding hi loin i tu i tate khang sawn dongin a kizang thei, a kikhom suak thei ahi ding cihnopna ahi hi. Tua ahih manin i tu i tate khang ading ngaihsutna tawh tu hun ei khang ah i nuntakzia, i lokhawzia a kipan vai tampite ah ngaih sut siam mahmah hong kul ding hi. A hun bei dek ta hi.

Zogam mun le leite ah an kung, singkungte nuntak nading a kizam, om loh a phamawh pen ahi leitungtham leihoih (Top Soil) te pen letmat 2 ciang khawng a thukpenin kimu thei bek hi. Hih a tungtham leihoih a bei loh nadingin a kemcing ding pen singkung le lopa, bi le lo te mah na hi zel hi. I taangam neih sunsunte ah Zolo (Shifting Cultivation) kibawl a, singkung tampi tak ki phukmai mang ihih manin guahtui hong tawm tektek a, ciktui luituite zong hong kang tektek hi. I lokhawhna sunsun ah eklei hoih nawn lo ahih manin ante hong piang zo nawn mel lo a, " I mun, i gamah an kikhawm zo nawn kei " ci'n kiphunphun ta hi.

Tu hun pen Computer - IT hun kici a, hih Computer - IT hunah ei Zomi i Pu i Pate i khua ngaih sut, pilna, siamna ciangciang bek tawh kal kisuansuan thei nawn lo ding hi. I Pu i Pate hun lai-in pilna siamna sinna Sang om nai lo/ tam nai lo ahih manin a tuu le a ta a hi ei hun teh i zat ding, i nek ding bangmah hong nusiat mel lo uh a, amau hong sih khit uh teh a beimang hi lel mawk hi.

A tunga thute en kik le'ng, leitung mun le gamte i puahphat kik nading a kizam pen leitung pilna (Secular Education) mahmah ei Zomite a dingin thupipen ding hi. Tua ahih manin Nang mahmah leh na tuu na tate ading leitung pilna a kizang thei ciangciang khat na neih kul ding hi.

I teenna gam i Pu i Pa i leitang pen ei hun teh tul ta a, kizang thei nawn lo, an kikhawm zo nawn lo ahih manin tuhun teh Zogam pen kinusiasia a, kitaisansan ta hi. I Zogam a i khua neuneute ah Piteek Puteekte le naungekte bek om uh hi. Nasem ding (Labour force) tangval, nungak a cidam a kizang thei tawm mahmah ta hi. Bek tham loin khua tampite

ah mi kiteeng lo, inn hawm tampi tak ki mu thei hi. I khua i tui ah an piang hoih nawn lo, sumzon nading, nasepna mun (Work Place) jom lo ahih manin nasem thei, sum zong thei teng in ih khua i tui nusiasian nasep omna sum le pai omna, an le tui kikhawm zawkna munte a hi khuapi (Gtn. Yangon, Mesauk, Kualalampur, Singapore, etc.) te ah kipai a, kitaitaita hi.

Kawlte'n " Tawtar Myotet " (တောသားမြို့တော်) ci a, gamsung pan khaulam mite khuapi lam hong tung uh ciangin buaina tampitak in hong nungzuih uh hi. Gtn. Omna teen nading innkim innpamte tawh kipawlkhop theihlohna, khuapite le kkuatate theihdan, pildan kibatlohna, annek tuidawn kilaih a nopsaklohna, kampau luhek kitel lo a kipawl theihlohna, tui le huhi khuahun tawh kilemlohna cih bang (issues) buaina tampi tak tawh kiphukha tawntung ngiat uh hi.

Hih a tunga khuapi lam zuan a taina, lalna (Urbanization) pen a kizomsuak khantoh nading hong dal hong khak pen thu, thubulpi ahi hi. " Sustainable Development " i ngah theih nading hih " Urbanization issue " pen natna gilo tawh kibang ahih manin, hih Zomite natna pen Nang mahmah in na bawlsak ding kizam hi. Nang mahmah siavuan, nang mahmah Wardservent na sep kul ding hi.

" Development Thinking " ci a khantoh nading ngaihsutkakna ah hih " Urbanization issue " pen formula bawldan khat tawh kikhawm a, kibawlphe thei ci hi. A kizomsuakin khantoh nading a nuaia thute thupi mahmah ding hi. Bawldante;

1. Zomi te, khaulam mite lai theisak kim ding.
(Lai thei lote khem thuak baih deuh hi.)
2. Sange ah khutsiam pilna le sanglai pilnate sinsak thei ding.
(Asinte uh pen a kizang thei ngiatte hi ding)
3. Zogam ah sumzonna sumbawlna Workplace bawlsak ding, sum thalawh theih na'ng gelsak ding.
(Home industry, Small skill factory-te lamsak ding)
4. Zogam lokhawh, singphukzia thusinnate bawlsak zel ding
(Model Garden, (မြေဥယျာဉ်) bawl sak ding)
5. Micro Credit Bank, Seed Bankte bawlsak ding
6. Khual le zinte, lenglate hong hawh nopna ding i mun i gam zem a puahpha ding. (Tourist attraction ..etc.)

Hih a tunga teng tawh Zogam kipuahpha kik thei ding hi. Tua bang tawh i puahphat zawh kei leh " Urbanization " i dal zawh nading pen khuapi (Cities) te gentehna Yangon le Zogam a om ih khua te kikal ah " Khuathak, munthak " khat i zonsak i satsak kul ding hi. Tua munthak ah a tunga thute i bawlsak kul ding hi. Hi mun pen ei Zomite a dingin Kawlzang, Kawlpi, Khampat nai le Tonzang, Tedim le Sagaing Division thum kituahna " Green Triangle " munte ah niangteh lo bawl a, khuathak i sat ding kizam hi. Sawt lo-in Kawlpi pen Zomite teenna khuapi hong suak ding a, i Zogam pen ih lokuanna i lokhawhna munte hong hi ding hi. Na khekhap tunna peuhpeuh, na sikna, na teenna pen nang' mun, nang' gam hong suak ding hi. Kawlmitte teenna Kawlgam kici a, Zomite teenna pen Zogam mah hi lel ding hi. Bang mah lungkiat, sinkiam nading thu om lo hi.

ZSK - Central Pawllutang le ZSK - Ygn EC meeting; Zomi Siamsin Kipawlina - Central pawllutang Tg. Zam Thuam le Zomi Siamsin Kipawlina - Yangon EC te kimuhkhopna pen 1.8.09 ni 6:00pm - 8:00pm dong No.177,1st floor, Seikkanthar Road, Pa Vum Lian Thang' inn ah nei uh hi.Siamsin nasepna kalsuandan ding le 2009 Tedim Seminar vaite kikum uh cih kiza hi.

Chin Social Welfare Organization - Yangon EC meeting ; July 29, 2009 ni-in CSWO - Yangon EC te kimuhkhopna pen No. 274, Shwebonthar Road U Mang Kul' innah nei uh hi.October kha sungin CHIN KHUADO (ကော့စ်သ်စားပွဲ) cih Chin khempeuh ki hel pawl bawl ding in khensat uh hi.Ngeina lam tuamtuan lahna le ngeina an food fare-te kinei ding hi.Tua munah ZOMUS te'n Music lamah makai ding uh cih kiza hi.
By Zozam

A (2) veina Ph.D (Secular) ngahte kipahtawi; Zomi Innkuan - USA te vaihawmna tawh Tedim Association - Yangon te'n makai-in a nih veina Zomi Ph.D ngahte pahtawi piakna pawl pen July 18,2009 ni 11:00am - 1:00pm dong FBTS sang innah ki nei hi. Zomi Innkuan - USA President Rev. Dr. Chin Do Kham in US a om Zomi te tangin pahtawina laidalpi le Ks.100,000/- tawh pahtawina pia hi.2009 kum Ph.D ngahte a nuaia bang hi.

1. Prof. Dr. Lian Za Khup
2. Prof. Dr. Aye Aye Ngun
3. Dr. Kham Man Niang (London, UK)

ZSK - Mdy le ZSK - Myw te'n fellowship nei khawm; Zomi Siamsin Kipawlina - Mandalay le Zomi Siamsin Kipawlina - Monywa te 26.7.2009 ni-in Monywa khua ah kilawmtatna nei uh hi. Monywa siamsinte'n AG biakinnah sun an tawh vaak uh hi.Excursion paina le social game kimawl uh a, gualnuam mahmah uh cih kiza hi.

Zo lai sinna om ding; KyaukMyaung Homecell te makaih na tawh September kha a ki panin No. 40 (B) 3rd floor, Thadi Pa Htan Street ah Zolai sinna om ding hi.Alung lut te'n

1. Nu Dim Khan Niang ph: 552165
2. Nu Ning Hau Cing ph: 710067 te ah ki dawp thei hi.

CCJC bawl nading sumdon kipan; Cope Centennial Jubilee Celebration bawl nading tawh kisai-in Finance Sub Committee - Tedim makaihna tawh pawlpi tuamtuan pan muan le suante kiangah inn khat ciang Ks.100,000/- ta huhna ngen uh hi. Tedim khua sung teng a man khit uh ciangin Zanggam lamah zong dong suak lai ding uh cih kiza hi.

Tedim ah Internet Cafe; Tedim khua ah zong Internet cafe (4) om ta hi. Mi tampi'n zangin a utna peuhpeuh uh hopih ziahziah, E-mail khawng khak ziahziah ta uh hi.Tua tawh ki zui-in Tedim, Myoma AG biakinn geia, "Deihsakna Human Resources Center" (Dimtui laibu Saal) panin nu le pate, siate, khangnote'n Internet nuamtakin a zattheih nading uh ngim na tawh " Computer for Everyone "ci'n Computer sinman niamlak mahmah uh cih kiza hi. *Ref: Internet*

Leidawh le Sakollam Meikang huhna; Leidawh le Sakollam a meikatna hang tawh gentheihna, dong tuahna a thuakte huh nadingin Sweden gam a om te'n Ks.1,865,000/- huhna pia uh hi. Leidawh inn 25,Sakollam inn 3, a kigawm inn 28 in kituat hi. Inn khat ciangin Ks.66,600/- bang ngah thei ding uh cih kiza hi. *Ref.Internet*

Emmanuel Baptist Church - Lashio; Shan gam Lashio khua a om Emmanuel Baptist Church i kum (10) cinna Tin Jubilee pawl pen 23.8.2009 ni-in bawl ding uh hi.ZZBAGS Rev.Kham Suan Mung in Jubilee sermon pia ding a, ZBCM president Rev. En Khan Hau in Jubilee pawl honna, TTBAGS Rev.Kai Sian Mang in mualsuang honna nei ding hi. Jubilee laibu le T-shirt bawl sawm uh hi. T-Shirt khat ciang Ks.3000/ tawh zuak ding uh cih kiza hi.

A masapen Zomi Sing Song Service - D.C; USA gam D.C area kim a om Zomite makaihna pawlpi ahi Siyin Burmese Mission Church (SBMC),Evangelical Baptist Church (EBC), Zomi Christian Community Church (ZCCC) te kigawmkhawmin a masapen " Zomi Sing Song Service " pawlpi pen July 18,2009 ni-in ZCCC te kikhopna biakinnpi ah nopci takin nei uh hi.Tua munah Bethel Assembly of God - Tedim pawlpi kem sia Rev.Dr.Khai Khan Suan in hanthotna pia hi. Hun man ciangin inntek pawlpi ZCCC te'n aksa tangeiim tawh vaak uh cih kiza hi.

Pasian' thu hilhin; Ambassador Baptist Church Pastor Dr.Mang Cin Pau in khuapi khuano a om Zomi Pasian' nasepte a veina tawh "Pasian' thu hilh in" cih Pasian' nasepte' khutlet ding laibu hoih mahmah khat bawl a, a deih peuhpeuh akhongin pia hi. A lungluten HP: 095012675, E-mail:gmdpau@gmail.com ah kikan thei ding cih kiza hi.

Khualzinna;
1. Myanmar Institute of Theology (MIT) a khangthak Zomi sang sia a hi Sia Go Van Mung pen USA gam a sang minthang khat a hi Yale University ah paper presentation pia ding in July1,2009 ni-in Kawlgam panin ding khia hi. A paper presentation pen Mission, Law,Custom: revisiting the works of the American Baptist Missionaries among the Chin People hi-in July 21,2009 ni-in gualzo takin Kawlgam hong tung kik hi.

2. Zomi Innkuan - USA pawllutang Rev.Dr. Chin Do Kham pen Pasian thu tangkona le leitunbup Zomi kipawlinate hanciampihna tawh nopna le dahna ah ZYA-Kawlpite zat ding motor khat (လူမှုရေးဇာဉ်) apna nei ding in July 8, 2009 ni-in Kawlgam hong zin a, July 22 , 2009 ni-in USA gam lam zuan kik hi.

Dahpihna;
Tonzang khua (Pu Thang Za Kai - Pi Don Khaw Cing) te' tapa Pa Pum Za Kap, Nu Don lam Ciin' pasal, Lasa siam Zamnu' pa in 26.7.2009 ni - in hong nusia hi.

MOMNO tawh kizop na'ng;
E-mail : pslian07@gmail.com, suankap@gmail.com, siamsin.ygn@gmail.com
Phone : 01-552165, 01-299405
G.P.O Box : 1243
Address : No. 60, Kyaukmyaung Street, Tamwe, Yangon.